

V халықаралық Фараби оқулары жоғары деңгейде өтті

Әл-Фараби атындағы ҚазҰУ-да 4-15 сәуір аралығында өткен дәстүрлі V халықаралық Фараби оқуларының қорытынды жиналысы өтті.



ҚазҰУ ректоры Ғалым Мұтановтың бастамасымен қатарынан бесінші жыл өткізіліп отырған Фараби оқулары Елбасы Нұрсұлтан Назарбаевтың «Болашаққа бағдар: рухани жаңғыру» бағдарламалық мақаласы аясында өтті. Конференция атакты ойшыл, Әлемнің екінші ұстазы атанған әл-Фарабидің философиялық ой-пікірлерін, жазған кітаптарын, бай мұрасын жан-жақты зерделеуге бағытталған. Ерекше айта кетерлігі, Фараби оқуларының ауқымдылығы жыл өткен сайын кеңейіп, шараға шетелдіктердің қызығушылығы артып келеді. Биыл форумның ашылу салтанатына әлемнің 30-дан астам елінен шетелдік ғалымдар келді, сонымен қатар еліміздің ЖОО-лары мен ғылыми мекемелерінің өкілдері қатысты.

ҚазҰУ ректоры Ғалым Мұтанов: «Бүгінгі техника мен технология қарыштап дамыған заманда әл-Фараби мұрасы ерекше құндылығымен адамзатқа әсер етуде. Өйткені техника адамдарға керемет мүмкіндіктерді ашқанмен, зиянын да әкелуі мүмкін. Сондықтан сана мен руханияты тепе-теңдікте ұстай білу өте маңызды. Осы тұрғыдан келгенде әл-Фараби барша адамзатқа сананың ең биік қозғаушы күші руханият пен адамгершілік болуы керектігін, олай болмаған күнде әлем жаһандық апатқа ұшырап, бар құндылығымыздан айырылып қалуымыз мүмкін екендігін айтқан екен. Демек, әл-Фараби мұрасы жас ұрпақты білім мен адамгершілік ұғымын қатар алып жүруге шақырады», — деп атап өтті.

Халықаралық форум аясында 17 ірі халықаралық шаралар, ғылыми конференциялар мен дөңгелек үстелдер, семинарлар мен инновациялық жобалардың байқауы өтті. Қорытынды жиналыста студенттер мен жас ғалымдарға арналған «Фараби әлемі» атты халықаралық ғылыми конференция туралы Ғылым және инновациялық қызмет жөніндегі департамент директоры Серік Мұхамбетжанов баяндама жасады. Дәстүрлі түрде жыл сайын өтіп келе жатқан студенттер мен жас ғалымдардың «Фараби әлемі» атты халықаралық конференциясына 6325-ге жуық студенттер мен жас ғалымдар қатысқан. Олардың

ішінде 583 қатысушы еліміздің ЖОО-ларынан болса, 301 қатысушы алыс-жақын шетелдерден келген, атап айтар болсақ, Нидерланды, АҚШ, Корея, Қытай, Ресей, т.б.

«Фараби әлемі» аясында факультеттерде 117 секция жұмыс жасап, 191-ге жуық дөңгелек үстелдер мен ғылыми семинарлар өтті. Ал жас ғалымдар байқауына 72 инновациялық жоба ұсынылып, жүзден жүйрік мыңнан тұлпар шыққан жеңімпаздар диплом және ақшалай сыйлықтармен марапатталды. Солардың ішінде ерекше атап өтетін инновациялық жоба — механика-математика факультеті студенттері құрастырған «Гуманоид-робот», яғни әмбебап робот көпшіліктің қызығушылығын туғызды. Адамға тән іс-қимылдардың барлығын жасай алатын «Гуманоид-робот» болашақта ҚазҰУ-дың «Керемет» студенттерге қызмет көрсету орталығында қызметкерлермен бірге студенттердің сұрақтарына жауап беретін болады.

Сондай-ақ жиында V халықаралық Фараби оқулары бойынша есеп берген факультет декандары мен жауапты тұлғалардың баяндамалары тыңдалды.

Фараби оқулары аясында өткен ірі шаралардың бірі — Оңтүстікте тұрақты даму үшін ғылым мен технология бойынша комиссиясының («COMSATS») XXI-ші отырысы. Аталмыш халықаралық үкіметаралық ұйым кеңесінің отырысы Қазақстанда және посткеңестік кеңістікте алғаш рет өткізілді. ҚазҰУ 2015 жылдан бері аталмыш халықаралық ұйымның ТМД-дағы жалғыз мүшесі болып табылады.

Ұлы ойшылдың 1150 жылдық мерейтойын 2020 жылы ЮНЕСКО деңгейінде атап өтуді мақсат етіп отырған ҚазҰУ әл-Фараби мұрасын зерттеу бойынша Фараби оқулары атты аса ауқымды шараны атқарып отыр. Одан бөлек ғалымның кітаптары жарық көріп, мұражай ашылды, сондай-ақ «Al-Farabi university smart city» жобасы жүзеге асырылуда. Әлемнің екінші ұстазы атанған дара да дана тұлға әл-Фараби мұрасы жылдар жылжып, заман канша өзгеріске ұшыраса да өзінің өзектілігін ешқашан жоғалпақ емес.

Перизат ЖАРЫЛҚАСЫНОВА

ФОРУМ ЖУРНАЛИСТИКИ

В рамках V Международных Фарабиевских чтений при содействии Бюро ЮНЕСКО в Казахском национальном университете им. аль-Фараби прошел форум на тему: «Прогресс в применении модели учебных программ ЮНЕСКО по обучению журналистике: их вклад в устойчивое развитие».

В 2017 году по инициативе кафедр журналистики вузов, МОН РК создало Клуб Alma-Mater of Journalism. Впервые клуб проводил форум в рамках V Международных Фарабиевских чтений, который дал возможность обозначить проблемы и приоритеты образовательных программ по журналистике с участием ООН, Посольства США в РК, Посольства Афганистана в РК, Британского Совета Международного центра журналистики MediNet.

В работе форума приняли участие представители МОН РК, сотрудники кафедр ЮНЕСКО по журналистике и коммуникации КазНУ, СМИ, ученые, студенты, магистранты и докторанты университетов Казахстана и Кыргызстана.

Продолжение на 4 стр.

Ізгілік нұрын төккен өнертабыс

Ағымдағы жылдың сәуір айының 6-9 жұлдызы аралығында Павлодар қаласында С.Торайғыров атындағы ПМУ-да Тель-Авив университетінің Қазақстандағы достар ассоциациясы қолдауымен «Мейкатон ТОМ: Kazakhstan» халықаралық байқауы өтті. Оған еліміздегі өзге оқу орындарымен қатар әл-Фараби атындағы ҚазҰУ өнертапқыштары қатысып, өз өнертабыстарын ұсынды.

Шараның мақсаты мүмкіндігі шектеулі жандардың өмірін жеңілдететін прототип жасау болды. Нәтижесінде БЦП шалдыққандарға арналған жанартылған велосипед, көзі көрмейтіндерге арналған белдік-навигатор, есту және сөйлеу мүмкіндігі жоқ жандарға арналған ақылды қолғап, т.б. жасалды.

Әл-Фараби атындағы Қазақ ұлттық университетінің «Techno RIM» командасы алғашында есту және сөйлеу мүмкіндігі жоқ жандарға арналған ақылды білезік жасамақ болған. Оның орнына жас ғалымдар бірден екі өнертабыс ойлап тауып, көпшілікке таныстырды.

«Біз ақылды білезік пен ақылды қолғап жасадық. Білезік Helpex, ал қолғап Glov S+ деп аталады. Біздің нидноуэрдін сөйлеу және есту мүмкіндігі туа бітті шектелген. Оның негізгі мәселелері: есік қонырауын, трамвай мен автокөліктер сигналын ести алмайды. Павлодарлықтар үшін бұл үлкен мәселе. Бұдан басқа, ол жедел жәрдем мен полиция, өрт сөндірушілерді шақыра алмайды. Біз білезікке SOS батырмалар орнаттық. Ол полиция қызметкерлерін шақырған кезде автоматты түрде үш хабарлама жіберіледі: біріншісі — туыскандарына, екіншісі — әлеуметтік қызметкерге, үшіншісі — полиция қызметкерлеріне», — дейді ҚазҰУ, Экономика және жоғарғы бизнес мектебі факультетінің 2-курс докторанты Асқар Әскеров.

Жалғасы 5-бетте

БҮГІНГІ САНДА:


КЕЛЕЛІ КЕҢЕС

2-бет



ҒЫЛЫМ
САЛАСЫНДАҒЫ
ЖАРҚЫН ЖОБА

4-бет



«ҚАЗАҚ
УНИВЕРСИТЕТІ»
ГАЗЕТІ-70 ЖАСТА

8-бет



«Ең қиын мамандық – АДАМ БОЛЫП ҚАЛУ»

Мамандық – кез келген адам үшін өмір сүру көзі болып табылатын және қандай да бір дайындықты, біліктілікті, өзіндік жауапкершілікті талап ететін еңбек қызметінің маңызды бөлігі. Біреулер үшін – мамандық ойлаған арман мен қалаудың орындалуы, сондай-ақ отбасы дәстүрін жалғастыру болса, келесі біреулер үшін жаңалыққа, білім шыңындағы дербестікке талпыныс, үшінші біреулер үшін әйтуір бір мамандық иесі атану үшін таңдалған бұрыс бағыттың нәтижесі деп білемін. Осы кезде кубалық жазушы, публицист Хосе Хулиан Мартидің «Мамандық таңдау – өміріңіздің кірпішін дұрыс қалау. Ең қиын мамандық – адам болып қалу» деген сөзі есімізге түседі. Иә, мамандық өз тағдырыңды таңдаумен бірдей. Дұрыс таңдалмаған мамандық өмірде де, еңбекте де өкініш тудыраы сөзсіз. Сондықтан адам баласы өмірде өз таңдауына өкінбейтіндей, өз қабілетіне қарай жүрек қалауымен сүйікті мамандығын таңдаған кезде ғана үлкен белестерді бағындыра алатынына сенімдімін.



Сондай мамандық таңдаудың аса маңызды кезеңін бастан өткерген мен үшін әкемнің берген кеңесі маңызды рөл атқарды. Дана халқымыздың «жеті рет өлшеп бір рет кес» деген ұранымен бүгінгі таңда әл-Фараби атындағы ҚазҰУ-дың философия және саясаттану факультеті, әлеуметтану және әлеуметтік жұмыс кафедрасы, оның ішінде «Әлеуметтік жұмыс» мамандығының студентімін.

Әлеуметтік жұмыс – жеке адамдардың әлеуметтік мәселелерін, ең алдымен әлеуметтік жәбір шеккен жеке тұлғалар мен қоғамдық топтардың әлеуметтік мәселелерін шешуге, азаматтардың әлеуметтік кепілдігі бар

құқықтары мен қажеттіліктерін қамтамасыз етуге, әлеуметтік қызметін атқару қабілетін қалпына келтіруге немесе көтеруге қолайлық туғызатын жағдайлар жасауға бағытталған кәсіптік іс-әрекеттің ерекше түрі. Әлеуметтік жұмыс – ізгілік пен қайырымдылыққа, сыйластық пен өзара сенімге негізделген кәсіп.

Кез келген бітіруші түлектің көкейін «Әлеуметтік қызметкер болып қандай орталықтарда қызмет атқаруға болады?!» деген сауал мазалайтын болуы мүмкін. Міне, сондай түлектер үшін айтарым, бүгінгі күнде әлеуметтік қызметкерлер Халыққа қызмет көрсету орталықтарында; түрлі бағыттағы

оналту орталықтары мен дағдарыстық орталықтарда; халықты жұмыспен қамту саласында; ауруханалар мен емдік-профилактикалық сауықтыру мекемелерінде; халықты зейнетақымен қамтамасыз ету орталықтарында және жастармен, егде жастағы азаматтармен, көпбалалы немесе көмекті қажет етуші отбасылармен тікелей жұмыс жасайтын, көмек беретін және т.б. мемлекеттік мекемелерде жұмыс атқаруға мүмкіншіліктері бар.

ҚазҰУ-дың «Әлеуметтік жұмыс» мамандығының бітіруші түлектері бүгінде әлемнің әртүрлі мемлекеттерінде өз білімдерін шыңдап қана қоймай, мамандықтары бойынша жұмыс атқаруда. Әлеуметтану және әлеуметтік жұмыс кафедрасының ұжымы шығармашылық потенциалды жауапкершілікпен өз кәсібіне және университетіне жан-тәнімен берілген. Оқытушылары халықаралық білім беру технологиясын жетік меңгерген. Бүгінде кафедра бітіруші түлектері үшін Ресей университеттерімен бірге қосдипломдық бағдарлама жұмыс істейді.

Білім мен ғылымның қайнар мекеніне айналған кафедра оқытушылары үшін өмірдегі ең негізгі басты қуанышы, әрине, өзі тәрбиелеген шәкірттерінің болашақта өзі жетпеген белестерді бағындырып, оны қуантуы болып табылатыны айдан анық.

Мектеп бітіруші түлектерге біздің ұшайын деп отырған алтын ұямыз – әл-Фараби атындағы Қазак ұлттық университеті, философия және саясаттану факультетінің әлеуметтану және әлеуметтік жұмыс кафедрасының «Әлеуметтік жұмыс» мамандығына жол бастауына және осы мамандықтың профессионалды маманы болуына шақырамын!

Шолпан ТӨЛЕНДІ,
«Әлеуметтік жұмыс» мамандығының
4-курс студенті

Менің таңдауым!

ҚазҰУ – армандар қалашығы! Жастық жалынын алаулатып, биік белестерге жетелейтін ұлы орда, құт мекен. Ұлы орданың қадір-қасиетін ұлықтап отыратын факультеттің бірі –филология және әлем тілдері факультеті, оның ішінде жалпы тіл білімі және еуропа тілдері кафедрасы. Көптеген студенттердің таңдауы түскен бұл факультет несімен ерекшеленеді?!

Орынды сұрақ. Білімді мен білікті, талантты мен талапты, өнерлі мен дарынды, ең бастысы, тіл жанашырларының басын қосқан бұл факультет қашан да ерекше.

Білімді де білікті оқытушылар сапалы құрамын сақтаған. Өтілген әр семинар, әр дәріс жүйелі түрде жоғары деңгейде өткізіледі.

«Студент жетістігі – оқытушы жемісі», – демекші, факультет пен кафедра үшін өзіндік орнын сезінген әр студенттің қажырлы еңбек етіп, нәтижелі қорытындыға қол жеткізуі білікті мамандар еңбегі мен тағылымы мол сабақтары деп білемін.

Факультет пен кафедра өміріне етене араласып, сіңісуі мақсатында студенттер үшін көптеген шаралар ұйымдастырылады.

Білікті де талапшыл ұстаз, терең дәрістер мен жоспарлы қоғамдық жұмыстар бір-бірімен ұштасып, нағыз білімді маманның шыңдалып шығуына жол ашуда.

Ендеше, еңсесі тік, қадамы нық, жас дос, бізге кел! Жалынды студент, жігерлі маман болып шығуың осы мекеннен бастау алмақ!

А. АЛТЫНБЕКОВА,
жалпы тіл білімі және еуропа тілдері
кафедрасының 1-курс студенті;
Жетекшісі: **Ж.Ж. ӘБІКЕНОВА**

ҚазҰУ тазалыққа шақырады

ҚазҰУ – еліміздің барлық жоғары білім беру жүйесінің тірегі, білікті мамандар ордасы. ҚазҰУ – ерекше мәртебесі бар Қазақстанның жетекші классикалық университеті, жоғары кәсіби, жоғары оқу орнынан кейінгі білім мен ғылымды инновациялық дамытудың ұлттық көшбасшысы. Университетте еліміздің барлық аймағынан келген 20 мыңнан астам студент, сондай-ақ алыс жақын шетелден келген студенттер білім алады.

Университетіміздегі игі істердің бірі – әр аптаның соңында өтетін сенбілік. ҚазҰУ қалашығы – ортақ үйіміз. Сондықтан оның көркейіп, гүлденуіне әрбір тұрғын бей-жай қарамай, коқыс, қалдықтарды кез келген жерге лақтырмай, таза ұстауға ат салысуы қажет. Гүлденген қалашығымызды одан сайын гүлдендіру мақсатында сәуірдің 14-і күні кезекті қалалық сенбілік өтті.

Сенбінің арнайы таңында ҚазҰУ-дың филология және әлем тілдері факультетінің шетел филологиясы және аударма ісі кафедрасы да аянып қалған жоқ. Кафедра меңгерушісі, филология ғылымдарының кандидаты, PhD докторы Данель Қарағойшиеваның бастамасымен белсенділік таныта қатысты. «Өзгені тәрбиелемес бұрын, өзінді түзе» деп халқымыз айтқандай, қаланың тазалығы өзіміздің тазалығымыздан басталады. Табиғат-ананы таза ұстауды өзімізден бастасак, өзгелер де үлгі алады.

Бағдат НАУБАЙ,
филология және әлем тілдері
факультетінің оқытушысы

Өнер мен мәдениетте шекара жоқ дейді дана халқымыз. Қазақ елі – көмейден шыққан ән арқылы мұң-мұқтажын жоқтап, қуаныш-қазынасын шартарапқа жариялаған халық. Тәуелсіздіктің ақ таңы атқанда да, қылышынан қан тамған алмағайып замандарда да серісі ән шырқап, ел көңілін жайласа, анасы баласына «әлдиін» айтып тәрбиелеген.

Тәуелсіз елдің ұрпағы да тәуелсіз. Өнер үйренем десе де, тіл үйренем десе де, ғылым қуып ғалым болса да жастарымыздың өз еркінде. Елбасымыз: «Ел болашағы жастардың қолында», – деп үлкен сенім білдірді. ҚазҰУ ректоры Ғ.Мұтанов «Айналанды нұрландыр» жобасын қолға алып, жастарды адамгершілік рухта тәрбиелеуге үлкен көңіл бөлуде.

«Өнер деген өмір сүру іздену, Білмегенді білгендерден үйрену» деген канатты сөзді жадында ұстаған ҚазҰУ-дың бір топ студенттерінен құралған «Көмек» қоғамдық қорының еріктілері Алматы қаласындағы мүмкіндігі шектеулі балалар мен ата-ана мейірімінен кенде қалған балапандардың қоғаммен тығыз байланысын нығайту мақсатында «Жарқын жұлдыз» атты өнерпаздар байқауын өткізді.

Жыл сайын дәстүрлі түрде өткізілетін бұл байқауда Алматы қаласындағы балалар үйі мен мектеп-интернаттардағы жүзден жүйрік, мыңнан тұлпар атанған жеткіншектер бактарын сынады. Жобаға қатысқан 8 балалар үйінен «Жарқын жұлдыз» сахнасында 78 баланың жұлдызы жарқырады. Жоба

«Жарқын жұлдыз – 2018»



ұйымдастырушылары мен қоғамдық қор еріктілері балалардың өнерлерін тосылмай көрсетуі үшін барлық жағдайды жасады. Байқау «Көркем сөз шебері», «Аспапта ойнау», «Ән айту», «Би өнері» кезеңдері бойынша өтті. Төрт кезеңнен бөлек түрлі номинациялар бойынша өнер көрсеткен балалардың бойындағы ерекше талант пен көздеріндегі өнерге деген ыстық махаббатты көрген кеш қонақтары ерекше әсерленді.

Таланты мен талабы бір арнада тоғысқан балапандар келген жұртты өнерімен таң қалдырып, әлі талай жетістіктер мен жеңістерді бағындыратынын дәлелдеді. «Саликалы ұрпақ»

пансионатынан қатысқан «Жас Алашұлы» тобы мыңнан тұлпар, жүзден жүйрік шығып, «Жарқын жұлдыз – 2018» атағын қанжығасына байлады.

Әрбір бүлдіршіннің болашағы көктегі жұлдыздай жарық толуын тілеп, ерекше сезімді қайттық. Өмір жолын енді құрып келе жатқан балалар мен ҚазҰУ жастарын табыстырған қара шаңырағымызға алғыс айтамыз!

Балым АСАНҚЫЗЫ,
журналистика факультетінің
1-курс студенті

Представитель китайской международной торговой компании в Казахстане Жарқын Асан провел лекцию на тему «Требования работодателей к выпускникам вузов, обязанности студентов в качестве работников»